

REALIZACIJA PROJEKTA „SOCIJALNO-NEPROFITNO STANOVANJE U BIH“

Realizacija projekta „Socijalno neprofitno stanovanje u Bosni i Hercegovini, januar 2008. - decembar 2010. godina“ čiji je implementator Catholic Relief Services (CRS), a donatori Ambasada Kraljevine Holandije u Sarajevu, Ministarstvo izbjeglica i raseljenih lica RS-a i Federalno ministarstvo raseljenih osoba i izbjeglica, nastavljena je u 2010-oj godini.

Uz pomoć partnera projekta, Vlade Kantona 10 i općine Drvar u Drvaru je završena izgradnja stambene zgrade sa 40 stambenih jedinica. Donatori su obezbjedili finansijska sredstva u iznosu od 697.500,00 KM, a partneri Projekta zemljište, potrebne dozvole i infrastrukturne priključke. Suvlasnici zgrade, Vlada Kantona 10 i općina Drvar, izvršili su odabir korisnika i ista je useljena u novembru 2010. godine.

U naselju Vitkovići, općina Goražde, realizovan je projekat izgradnje 20 potkrovnih stanova sa obnovom zajedničkih dijelova zgrade i izmjenom krovnih pokrivača na 14 stambenih zgrada. Ukupna investicija iznosila je 552.000,00 KM. Odabir korisnika je u toku, te se njihova useljenja očekuju u februaru 2011. godine.

Po Modelu 2. - „Socijalno neprofitno stanovanje potiče razvoj, povratak i reintegraciju u ruralna područja“, u mjesnim zajednicama Kratine i Godijeno-Slatina, općina Foča, grade se stambeno-poslovni objekti sa po 4 stana i jednim poslovnim prostorom. Izgradnja je započeta u decembru 2010. godine, a investicija je vrijedna 383.100,00 KM. Završetkom izgradnje, u maju 2011. godine obezbjedit će se 8 stambenih jedinica i 2 poslovna prostora.

Stanovi u svim izgrađenim objektima namjenjeni su korisnicima kolektivnih centara stanovanja, povratnicima koji borave u alternativnim smještajima, korisnicima Centra za socijalni rad i stručnim licima potrebnih za razvoj Kantona i lokalne zajednice. Stanovanje je regulisano ugovorima o zakupu između korisnika i vlasnika zgrada, Općine ili Kantona. Zakupnine su neprofitne za vlasnike zgrada i koristit će za investiciono i tekuće održavanje, upravljanje objektom, amortizaciju i osiguranje objekta.